



FAAVAEINA 1839

O LE SULU SAMOA

IULAI 2018

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

PAPA, E TE ALOFA IA A'U?

Daddy, Do You Love Me?

O le sauaina faaletino, faalemafau, ma faaleagaga



Nisi o le Mafutaga Aoao a Tina EFKS i se latou fono sa fai
Pito i tua: Faletua ia Atalua Situfu Tanielu, Maupenei Tuia Peseta, Sueala Koon Wai You, Maima Faauuga Matautia ma Matuli Harima Lemamea.
Pito i luma: Faafetai Leaso Tupai, Naomi Suafai Patu, Tailua Tavita Roma, Susana Tunumoso losia ma Savaliga Gu Time.

O le Agaga o le Atamai i Gagana

saunia mo le Fono Tele 2018 e
Fili S. Matalavea FT
EFKS Faleula, Matagaluega a Malua

Galuega 2 f. 4: Ua faatutumu foi i latou uma e le Agaga Paia, ua afua ai ona tautala i gagana eseese, pei ona foaina mai e le Agaga o le Gagana ia te i latou.
silasila itulau e 2

E iai ni manatu e fia aga'i iai se mafaufauga, aemaise o le Autu o lenei Fono Tele i lenei tausaga 2018.

1. Tapenapena mo le afio mai o le Agaga Paia. O le Agaga o le Atamai i Gagana.

Ai lava ua masani ona ave le

Efeso 6:2-3: Ia e ava i lou tama ma lou tina (o le uluai tulafono lea ua iai le mea ua folafolaina), ina ia manuia ai oe ma ia e nofo tulu'i ai i luga o le laueleele.

O le tala lenei, e faavae i luga o se tala na tusia e ni teine Kerisiano se toalua, o Ariel Allison ma Shelby Rawson, e fai ma
faauau itulau e 8

La'u Tamateine i Alatetele o le Aai

"Seni, tuu e alu." O le tala lea a lo'u toalua ma ona foliga filemu
silasila itulau e 10

O Le Na Tuulafoa'iina *The Rejected One*

Le Atunuu o Iapani ma le alofa faa-tina o le Atua

O Shusaku Endo, lea na maliu i le tausaga e 1996, o se tagata Iapani e le lau maua foi ona uiga: o se Kerisiano i lona olaga atoa.
faauau itulau e 4

faataua o lenei vaitau o le afio ifo o le Agaga Paia e fai ma Autu o Fono Tele taitasi i lea tausaga ma lea tausaga. Se'i faatamaoia ma faatutumuina ai le mamalu o le Ekalesia Aoao i meaalofa eseese o le Agaga Paia, e le gata i le tino, ae sili i le Agaga. Pei foi la o lenei foi tausaga 2018, ua faatauaina ai
silasila itulau e 2

O le Agaga o le Atamai i Gagana

le Agaga o le atamai i Gagana. Agaga o le Poto ma le Atamai i le tagata e tautala ma molimau ai. Sei toe foi lava i tua se faamatalaga, ina ua mavae le Toe Tu o le Alii. Ua silafia e Iesu, ua oo mai le taimi e tete'a ai ma ona soo, a o le a afio o ia i le lagi.

Peitai, e iai itu taua o loo silafia e Iesu e tataua ona mataala tapena ma saunia iai ona soo galulue. Ai lava o le naunauta'iga lea o le Alii Toe Tu o Keriso, ina ia aua lava ne'i o ese ma Ierusalem, se'i afio ifo le Agaga Paia i o latou luga. Na te faatutumuina ona soo galulue i le Alii o Keriso. Vaivaiga o ona soo galulue. E fia lelei ma fia matamuamua pe a latou feagai ma mafuta faatasi, ae tumu i le loto vaivai, fefevavale, ola masalosalo ma le itiiti o lo latou faatuatua. Pei o le soo o Peteru, na tautino ia Iesu la te oti faatasi, peitai ina ua ta'ita'i Iesu e faamasino, a ua taulafilafi solo ma faafitia le Alii. "Ou te le iloa lava lena tagata o Iesu."

O le fanau a Sepetaio, o Iakopo ma Ioane, o soo ua naunau i le fiasili ma fia avefa ma tagata muamua, ae faapefea isi ona uso-a-soo? O le soo o Toma, lona masalosalo, ta'u atu e isi soo ua latou iloa Iesu ua toe tu mai o ia, ae tali mai seiloga e tago i 'a'ao o Iesu sa tutu'i i fao ona faato'a talitonu lea.

Le soo o Iuta e tu'inaanu i mea a le lalolagi, ma ana upu faitio i le maumau o le suauu manogi sa uu ai vae o Iesu, ana faatau semanu e tele se tupe e maua ai, ma ave ai mo tagata matitiva. A o le tali a le Alii, tuu pea le mea taua ua ia faia, o le faata'imuaga o lona tanuga, o fea lava o le lalolagi e oo iai lenei tala, e ta'uta'ua ai lona igoa i le Mea Sili ua ia faia mo lona Alii. A o le taunuuga foi o lenei soo faalata, na malaia ma fano o ia. Popolega ia o le au soo, ma

foliga ua tuu fesili i o latou loto, pe aisea lava na filifili ai i latou e lea Alii, a o lea o le a alu ese. O ia sa faamoemoe iai le latou galuega, ma le tele o vavega na ia faia. Nisi foi ua manatu, sili ona toe foi i o latou aiga, ua maumau le taimi na mulimuli ai i lea Alii.

O faafitauli ia sa matua fetalai ai Iesu - Ia le tuua Ierusalem, sei outou maua le Agaga Paia. O le mana ma le malosi lilo mai le Atua, e tapena mae'ae'a ma faafou ai lo latou malosi i le tino, le mafaufau aemaise o latou ola galulue i la le Agaga. O lona uiga, lea lava ua atoatoa le tapenaga a le Alii, i la latou mafutaga. E le'i tuua faaleiloga, pe tuua foi ia tama. A o lea lava na taualuga le latou mafutaga i le 'oa sili mai le lagi, e faatamaoia ai le aufaigaluega gaogao'i'i ma le faatauvaa.

2. O le Afio ifo o le Agaga Paia - o le Agaga o le Atamai i Gagana.

O le Aso Penetekoso - o le aso na afio ifo ai le Agaga Paia i luga o tagata uma lava. Upu Penetekoso - o le limasefulu aso, poo le fitu vaiaso mai le va o le Paseka mulimuli a Iesu ma ona soo, seia oo mai i le aso e faamanatu ai le tasi o sauniga taua faa-Iutaia - o le Seleselegasaito. E faafetai ai i le Atua i fua o a latou faatoaga, ma le latou talitonu, o le Atua lava ua latou selesele ai i manuia o le laueleele. O uluai fua foi o a latou faato'aga, latou te ofoina atu e faitaulaga ai i le Atua. O le ala lea e taua ai i soo se Iutaia lava, poo fea lava e aumau ai i tafa eseese o le lalolagi, e fia oo lava i Ierusalem, e auai i le sauniga o le Aso o le Seleselega.

O le afio ifo o le Agaga Paia i luga o tagata, na liligi ifo ai meaalofa eseese mo tagata uma, e iai le perofetaga, toeaiaina fai miti, o e fai vavega ma faailoga, e faapea

foi i le Agaga o le atamai i gagana. A o le itu taua foi lea e tuufesili ai le mafaufau, pe faapefea ona tatou iloa le tagata, ua iai le agaga o le atamai i gagana. O le a le mea tatou te mautinoa ai?

A toe taga'i i mea sa tutupu i le Aso Penetekoso, ua taalili mai le lagi, peiseai o le matagi ua agi tele mai. Ua iloa atu o laulaufaiva e pei o se afi ua vaevaeina. Pei o le tiute taua lea o le laulaufaiva, o le gagana mai, ta'u mai, ma faailoa mai le feau taua o le Tala Lelei o le Malo o le lagi. O le Feau ua auina mai e le Agaga Paia i luga o le au soo, aposetolo ma e faatuatua uma sa i lea aso. O lona uiga, o le Agaga o le Atamai i Gagana e iloa i le molimau o le Tala Lelei o le Malo o le Atua. E iloa foi le Agaga o le Atamai i uiga ma amioga faale-Atua, ma o i latou uma foi, e fai ma molimau i le Tala Lelei o le Malo o le lagi, e iai le Agaga o le Atamai ia te i latou.

Ai lava ana o se feau e ese mai i le Tala Lelei, e atagia ai le fiasili, ma le fiapule, ailoga a gagana le laulaufaiva, ma e gugu foi le gutu e le tautala. E le fia molimau foi, e avefeau o le Tala Lelei. Ma e le mafai foi ona ta'ua, o se Agaga atamai i gagana. Ae o le a ta'ua, o le Agaga fia faumalo, fiasili ma le faamaualuga, e pei ona tatou vaaia i nei aso i le tumutumu o faamasinoga. Ua afua ai le fe'aina'i, fevaevaea'i ma le maua ai se toafilemu i o tatou aiga, nuu, atunuu ma le galuega pele a le Ekalesia.

O le agaga atamai i gagana, o le isi lea faata'ita'iga mai le aposetolo lauiloa i Nuu Ese o Paulo. Pei lava ona ia tautino ma tautalatala i le Ekalesia i Korinito - "O se ua ia Keriso o le tagata fou ia. Faauta ua mavae mea tuai, ma le ola tuai, a ua oo mai le ola fou."

faaauau itulau e 5

O le LAUGA

O le lauga i le Suafa Mamalu o le Atua le Tama, le Alo ma le Agaga Sa.

Amene

ManatuAutu: O le Faatuatua i le Atua o le faamoemoe ua mautinoa.

TusiFaitau: 2 Samuelu24: f22-24 Efeso 2:4-20

Matua - "Aua lavaou te le faitaulaga i le Alii lou Atua i taulaga maua fua."

Ua malie i le faalogo se saunoaga a se tasi Tiakono iloga o lenei pulega e faapea, "Se ua faamalo le tautua i le Atua i le tatou Pulega, aua ua ou mautinoa, o le tiakono EFKS e tupu pea mea i ona lima."

O se molimau manino i se faatuatua ua maua'a ma loloto, ua fua mai foi i le agaga fia faitaulaga, ma le loto fia fai mea lelei e tali atu ai i le alofa faaola, ma faamanuiaga a le Atua i lona soifua.

Na tatalo Tavita ia Aruna le sa Iepuse, i lana mea soli saito se'i fai ma fata faitaulaga i le Alii. Na talia fiafia e Aruna ma fai atu, e ave uma atoa ma povi e osi ai le taulaga ma amo o povi e fai ma fafie, e ave fua uma e leai se totogi. Ae ua fai atu Tavita "Aua lava ...ou te le faitaulaga i le Alii lo'u Atua i taulaga maua fua."

O Tavita o se tupu sili on tautaua o Isaraelu. E le gata o se toa manumanu ma se taitai'au loto tele, a o ia foi o se tagata loto alofa ma loto faamagalalo. Ua manino i nei uiga i lona alofa i le tama o Mefiposeta le tei o si ana uo o Ionatana, faapea foi lona faamagalalo ia Saulo le na saili e fasioti ia te ia'.

E ui lava o se Tupu sa ponatia lana nofoaiga, sa lape foi le matega i lana ta'ita'iga. A'o se Tupu lava sa nofo filemu ai ma sili ona lautele ai tuaoi o le Nuu Paia o le Atua.

O Tavita o se tupu sa manuia ma faafualoaina lona soifua galue. Sa maliu filemu lava i le nofoalii ina ua afu lona soifua, e le pei o isi Tupu sa tagatavaleina ma maliu fasia. Ua faatusaina o ia o se Tama Paia o Isaraelu, peiseai ua tulaga tutusa ma Aperamo, Mose ma Iakopo o e ua taua o le Au Paia o le nuu o le Atua.

O le malosi o le tala ia Tavita, ua avea ai ma tala e faagalogata i le mafaufau poo se tautinoga lelei i le Feagaiga Tuai ma le tala i le Mana Faaola o le Atua. O lenei tala ua tuusao mai lava, ua leai se faaitu'au, ua leai foi se faailoga tagata. O se tala foi ua le tau teuteu lumafale, pe faasinoino lima solo. O se tala ua tu'usa'o mai lava, ma ua ta'u mama mai.

Peita'i e tasi lava le toe pitofilo sa taofiofi ai mea uma o lenei tala. "O le Ola Faalagolago o Tavita ma lona talitonu i le Atua"

E ui lava sa uia le agasala sa solitulafono ma toe salamo ae lei faavaivai lona Faatuatua. O le ala tonu lea sa tumau ai pea le alofa o le Atua ia te ia. O Tavita ua savalia le lalolagi o mala, ma agasala, ma puapuaga ae na faamagaloina. Fai mai lana Salamo e 23, "E ui lava ina ou savali i le vanu o le ata o le oti, ou te le fefe lava i se mea leaga, aua o oe ta te faatasi ma a'u".

O loimata o Tavita ua loloto lona pa'i mai i ai tatou. Sa sola ma tagi lotulotu, ona o si ona atalii o Apisaloma, o si ona atalii sa pele i lona loto, a ua toe fouvale ma fia fasioti ia te ia. O se mea lava a faigata o lenei mea, atili ai foi o lana ta'ita'i'au sili ma le faamoemoeina o Ioapo na fasiotia Apisaloma ma lafo i le lua. O se mea lava a tiga ma faigata o lenei mea ua oo ia Tavita. Ua tagi o ia ma fai mai "Apisaloma e, ta fia oti e sui ai oe!" O le alofa faatama e le uma e pei o le alofa faatama o Le Atua. Ua ia osia le taulaga tutasi i lona lava alo pele e toatasi.

Ua puapuagatia fua lo tatou Alii o Iesu Keriso Ua ia tauave o tatou sese ma o tatou faaletonu i luga o le satauro. E pei ona molimau manino le Aposetolo o Paulo, "Aua o le alofa tunoa ua faaolaina ai outou i le Faatuatua....., o le mea ua foaiina mai e le Atua, aua o lana lava galuega i tatou na fai ai tatou ia Keriso Iesu ina ia faia galuega lelei," O lea le mamalu o le Ekalesia Paia a Iesu Keriso, ua faamafanafana mai afiga a le tatou Atua mo i tatou. O le mea lelei lea sa ia Tavita, ma faatumauina ai o ia e le Atua. Aua sa tumau lona faatuatua ma lona faamoemoe i alofa faatama o le Atua Soifua.

O lo tatou Atua, o le Atua e alofa fua ma alofa faamagalalo. E telegese lona toasa ae vave lona alofa. E pei ona molimau le Aposetolo o nuuese: "aua o le alofa tunoa ua faaolaina ai lo tatou faatuatua." O le meaalofo ua foa'i fua mai e lo tatou Atua e le o so tatou lelei po'o sa tatou galuega na fai ina ne'i mitamita se tasi.

O le faatuatua ua fua mai i galuega lelei, o le agaga fia fai taulaga ma le soifua ua fia ofofua atu ma fia aoga i le atina'e o le malo Iesu Keriso i le lalolagi. O le loto ua fia tautua ma ua fia auauna i le malo alofa ma le malo filemu. Ina ia tupu pea ma olaola le malo o le Atua i le lalolagi o le Ekalesia o le tino lea o lo tatou Alii o Iesu Keriso. O lo tatou Alii Faaola o le na maliu ma toetu manumalo mai le oti ma le tuugamau, o le na fetalai "O la'u Ekalesia, e le mafai e faitoto'a o seoli ona manumalo iai."

AMENE

Saunia: Periti Fauolo (FS)

**la sili ona
leoleoina o lou
loto i lo le
leoleoina o mea
uma, aua e tupu
mai ai le amio.**

O Lē Na Tuulafoa'iina

The Rejected One

Le Atunuu o Iapani ma le alofa faa-tina o le Atua

mai le itulau muamua

I le atunuu e na o le tasi le pasene o le faitau aofa'i o ona tagata e Kerisiano. Na faafaileleina mai o ia mai lona tamaitiiti e lona tina e matua talitonu i le lotu Kerisiano, ma papatisoina ai o ia i le faato'a sefulu tasi o ona tausaga. Ae o se mea e sili ona ofoofogia, o Endo, o le tusitala (author) aupito sili lea ona lauiloa o le atunuu o Iapani. O ana tusi e faavae i luga o mataupu poo tala e faavae i talitonuga faa-Kerisiano. E le gata i lea, toetoe lava o ana tusi uma e tele lava ina numera tasi i le faatulagaina o tusi faatau atu (No.1 Bestseller). O le siamupini o ia i mea tau tusitala i le manatu o le toatele o tagata Iapani. Na viia ana tusitusiga e nisi o tusitala iloga o le lalolagi e pei o John Updike ma Graham Greene, fai mai foi le toatele o tagata e tataua ona tuuina ia te ia le faailoga taualoa o le Nobel Prize for Literature. E iva

ana tusi ua uma ona faaliliuina i le gagana Peretania. A o lana tusi aupito sili ona lauiloa ma mana'omia e tagata o le tusi lea e igoa o le "A Life of Jesus", o se tala e faavae i luga o lona ola faatuatua.

Sa faatagataeseina lava ia a o ola a'e i Iapani i le vai taimi o lumana'i le Taua Tele Lonalua a le Lalolagi - 1939-1945, Sa tele ina tuua'iina o ia ma upuvaleina foi ona o lona auai i se lotu e le se tapuaiga mai Iapani ae mai fafo.

Ina ua ola le Taua Tele Lonalua a le Lalolagi, ona malaga ai lea i Farani ma lona faamoemoe na te suesueina ai tala o le soifua o nisi o tusitala logologoa Katoliko o Farani e pei o Francois Mauriac ma George Bermanos. Ae le'i talileleina o ia e tagata o lea aai o Farani, o Lyon. Ua lau ma faaali le faailoga lanu o tagata ma lau lona Iapani, a ua le ta'ua le lotu e pei ona sa lau i lona atunuu o

Iapani. Ona o le la e le'i leva ona ola le Taua, lea sa matua faaleagaina ai i tala e fai, e autau a Malo i Sisifo (Amerika, Peretania, Farani ma isi ni leaga o Iapani ma ona tagata, faapea foi ma le atunuu na 'au ma Iapani o Siamani.

Teena ma le talia e lona nuu moni; teena foi ma le talia e lona nuu faaleagaga o Farani. Na fai lea ma mea e matua lu'iina ai le faatuatua ma talitonuga faa-Kerisiano o Endo. Ona alu ai lea ua matua su'esu'e le soifuaga o Iesu i Palesitina le laueleele na soifua a'e ai le Alii Faaola. O ana su'esu'ega ia na sui ai ona lagona ma talitonuga, ma ia maua ai, o Iesu foi, na fetaia'i ma le tuulafoaiina ma le teena e ona tagata. Ae sili ai i lona - o lona soifuaga atoa, o laueleele lava ma fanua o le teena ma le tuulafoaiina, na soifua a'e ai. Sa inoino ma 'a'amu ona tua'oi ia te ia. Na masalosalo foi lona lava aiga pe o lelei lona ulu pe leai. Na faalataina o ia e ana uo mafana. Ma e na faafesuia'i lona ola ma le ola o le tagata faatupu faalavelave, e tagata o lona lava atunuu. A o iai o ia i le lalolagi, e peiseai o tagata lava sa tuulafoaiina ma le amanaia e tagata, sa femili ma Iesu e pei o lepela, fafine mulilua, 'au ao lafoga, pipili, ma tagata agasala ma solitulafono.

Na pei e taia Endo e se faaaliga ina ua ia malamalama i ia mea. Mai lona nofo mamao mai lona atunuu o Iapani, na ia manatu ai o le lotu Kerisiano o se faatuatuga manumalo ma malosi. Na ia suesueina foi le Malo Pa'ia o Roma ma Taua Pa'ia tautaua a le 'au Kerisiano (Crusades), ofo i le mananaia o ata o malumalu Kerisiano tetele o Europa, ma moemiti i le fia nofo i se atunuu e avea ai o ia ma Kerisiano e aunoa ma le upuvaleina. Ae o lenei la ua ia suesuea le Tusi Paia, ua ia mautinoa ai, e le'i 'alo'ese foi Iesu mai le faamasiasiina. O Iesu lava

faaauau itulau e 7

O le Api o le Galuega o se vaega o le galuega a le Faifeau

Malolo le faifeau ina ua atoa le 30 tausaga o galue i le nuu, e su'e atu le Api o le Galuega, e leai se mea. Tolu sefulu tausaga e leai se mea o faamaumauina o le Galuega. Misi uma ni faamaumauga o ni mea na tutupu e pei o maliu, o tofi tiakono, o e na fananau ma aso na fananau ai, ma isi mea e tele

e pei ona a'oa'oina i le Kolisi Faafaifeau i Malua.

O le api lea e matua taua lava mo tagata o le nuu aemaise le aulotu. I tausaga mulimuli ane, e saili atu i ai e aiga ni mea na tutupu, aemaise o aso fanau ma ni fanua na foai e ai ma ai mo le Ekalesia. A leai se Api o le Galuega, ua misi uma ia mea. O le Api foi o le Galuega e le alu le faifeau ma ave pe a uma lona taimi i le nuu poo le aulotu. E tuu ai pea lava i le maota o le Galuega mo faamaumauga a isi foi faifeau e faasolo atu iai i le galuega i le aulotu ma le nuu.

O le Agaga o le Atamai i Gagana

mai le itulau e 2

Aua a toe tepa i tua i le olaga tuai a o igoa ia Saulo, o ia o se Iutaia o le Ituaiga o Peniamina. E aiga faatasi ai ma le tupu o Saulo. O se tagata lava ina a faamaualuga, fia sili ma le le fia toilalo. O le faiaoga o le tulafono o tapuaiga faa-Iutaia. Mafuaaga lea o lona sauaina o le au Kerisiano, ina ia aua ne'i faaluaina le lotu Iutaia i se isi talitonuga e ese mai. Poo fea lava e faalogo ai Saulo i le mea o iai le au Kerisiano, e le toe faatali. E tula'i ma tuliloa. E pei foi ina alu i le Ala i Tamaseko, e tapu'e le au Kerisiano, saisai ma lafo i le falepuipui. O le tagata ua iai le agaga fiasili ma le faamaualuga. Ua tautala foi le laulaufaiva i upu soona fai ma le fia toa e le fia toilalo. Ae talofa, ua le tau lau o lona ma'elega ma lona faamoemoe soona fai, ina ua taia o ia e le pupula malosi o le Alii, ma pa'u ai i lalo i le eleele. Ua tauaso ma ua leiloa se mea.

Ioe, e tulaga ese taimi ma ituaso o le Alii. Poo le a le fia ma'ema'e o le malosi, poto ma le atamai faale-tagata, e alu lava ma le faalologo ma le usiusitai i le faasinoga ma le ta'ita'iga a le Pule Aoa o Keriso. O ituaso ua lagona ifo le salamo. Ua sola le malosi, ua mavae le faafiapoto ma le faafia atamai o le tagata. Aua augani ma tatalo i le Alii, le Alii e, se a ea se mea e te finagalo iai ou te faia? O le tagata ua lafoai atoa le ola, e pule ai le Alii o Keriso. Faitalia le Alii i le faaaogaina o lona tagata. E pei ona fetalai le Matai e ana le galuega - Paulo, o oe o le Vaa ma le ipu e te molimoli lo'u igoa i nuu ese. Le Auauna ua faafou e le Agaga o le Alii o Iesu. Ua tuu ese le faamaualuga. O le agaga leaga o le fiasili ma le mitavale. A ua toto i le loto le Agaga o le Atamai,

e gagana ma molimau ai i le Tala Lelei o le Faaolataga, pei lava ona ia tautino - o se ua ia Keriso, o le tagata fou ia. Faauta ua mavae mea tuai, a ua oo mai le Ola Fou.

O le galuega o le tele o faafitauli, o faigata, puapuaga i ana malaga faamisionare. Faafia ona molia ma faamasino e toeaina o le lotu Iutaia, ma ositaulaga, aemaise o fonotaga a nuu. Ua saisai ma lafoai i falepuipui, aemaise foi o le le fefe e molimau le Tala Lelei i tupu ma ta'ita'i o malo, pei o emeperoa o le malo o Roma.

O le naunauta'iga lea, ia oo lava le molimau i Roma, aua sa pulea e Roma le lalolagi i na ona po. O le oo i Roma o le Tala Lelei o le lalolagi lava lea. E le fefe e molimau atu i tupu ma ta'ita'i o malo ma atunuu. O alii sili ma faipule ma le lalolagi uma. Lea lava sa maliu faa-maturo ai le aposetolo i luma o le sau o Nero, o se tasi o ta'ita'i o Roma sa fai le au Kerisiano ma ona fili, taumafai e tape le tupu a'e o le talitonuga faa-Kerisiano, peitai e le mafai ona o le Agaga o le Atamai o le Alii Toe Tu. Na atia'e ma faatuina ai le ulua'i Ekalesia a le Atua, e le mafai e se malosi faale-lalolagi ona talepe pe soloiesea, ae tupu ma ola pea lava pea e oo i le faavavau. Mafua i se a ? O le Ekalesia e faavae i le Agaga o le atamai o le Atua. Molimau o le Atua na faaalua ai lona Alofa Tunoa i luga o le satauro, lona maliu ma lona Toe Tu Manumalo mai. A lea ua fai ma molimau a le Ekalesia - le Tala Lelei o le Faaolataga, e ala ia Iesu Keriso.

3. Agaga o le Atamai i Gagana i Egelani ma le Pasefika

Fetalaiga a Iesu i ona soo, aposetolo ma le au faatuatua uma, mulimuli ane, ia outou o e fai nuu

uma lava ma soo, papatiso atu i le Suafa o le Tama, le Alo ma le Agaga Paia.

O le Agaga o le Atamai sa gagana ai soo i le feau lava lea e tasi. Molimau ai foi le aposetolo, ma atia'e ai le uluai Ekalesia e le Agaga Paia. O le Feau lava lea e tasi - Tala Lelei o le Malo o le lagi. Sa afua ai ona faatuina ma faaosofia ai le Sosaiete a Lonetona Misionare ma fai ai la latou tonu, e o mai i le Pasefika, e tala'i mai ai le Tala Lelei lea o le Malo o le Lagi. Fai mai la latou tala, e lelei laueleele o le Pasefika, e valevalenoa, e faaleai ni a latou feau e faia. E maua mai lava le toeaina o tutu i lalo o le paolo o le nuu, ma le loomatua, o loo tae lauulu i lalo o le ulu, atonu e faigofie ona a'oa'o atu iai le "TalaLelei". Pei ua iloa foi e papalagi a tatou foi polokalame i lea aso ma lea aso, a uma lava gaselega o le taeao ma taumafataga, ona fai lea o se koma a oo i le paolo o le afiafi ona gasolo atu lea o tamaiti ma tupulaga e fai a latou tulituliga'i (tulituli'i) ma latou taufetuliga, ae taualuga ia latou igave'a i le po masina. Ai o faamalosi tino ia a le fanau, o loo faapea mai ai papalagi, e faaleai ni a tatou feau.

O le isi itu taua, e tataua ona silafia i faiga a misionare, o le manatu i faiga faa-koloone, e vaai maualalo ai i lenei itulagi o le Pasefika, pe a fua atu i isi atunuu tetele pei o Initia ma atunuu Moselemu, atoa ai ma Saina ma Iapani, aisea na le o ai iai? Poo le manatu e malolosi atunuu tetele e faigofie ai ona faaumatia i latou ma la latou feau tala'i? Peitai, e ui lava i lea, na fai la latou tonu ma malaga mai ai i Tahiti, agai mai i Toga, ma fuafua mai ai le malaga a le

faauau itulau e 7

Tuaiti Laimeni Muti 1837-1899

DWIGHT LYMAN MOODY

O le Faifeau e le'i Faauuina Aupito Logologoa

O le 'Au Toe Faaolaola

Ua Feiloa'i Muti ma Iesu

O le vasega a Tuaiti Laimeni Muti i le a'oga Aso Sa sa faia lea e Eteuati Kimipalo (Edward Kimball), o se tagata amioatua faamatua-tagata na oso a'e sona fiafia ia Muti le tama faigaluega e 18 ona tausaga o loo ia vaai oloa seevae o le pisinisi. O le Aso Toonai, aso 21 o Me 1855, na mafaufau ai ia Kimipalo e talanoa ia Muti e uiga i mea faaleagaga, ae tuu lana faitauga o le Tusi Paia e pei ona ia masani ai i aso ta'itasi. Ae na sui ona lagona a o le'i taunuu i le faleoloa o seevae. Na mafaufau ne'i te'i ua matamuli Muti i ni ana faamatalaga e fai atu ia te ia. Na ia savali atu, ma ia pasia le faleoloa seevae. Ae na toe liliu ma ulu i le fale, ma maua atu Muti o fili seevae ma teu i fata.

Na matua fiafia lava Muti ia Eteuati Kimipalo ona o ona uiga alofa na faaali atu ia te ia ina ua la faato'a feiloai i le potu a'oga. Na fai Kimipalo i tamaiti a'oga e su'e le Evagelia a loane, ma amata ai ona tasu'e solo itulau o le Tusi Paia a Muti, ona na te le iloa le mea e tu ai le loane. Ina ua iloa atu e Kimipalo le ese o le mea o su'e iai le Tusi Paia a Muti ma le mea e tu ai le loane, ona savali atu lea ua tuu iai lana Tusi Paia ua tatala i le mea o iai le tusi a loane.

I se aso mulimuli ane ona manatua ai lea e Muti lea aso:

E masani ona ou alu i le A'oga Aso Sa ma o le isi aso, ou te manatua lelei lava le ui mai o lo'u faiaoga i o'u tua ma tuu mai lona lima i luga o lo'u tau'au, ma talatalanoa mai ia te a'u e uiga ia Keriso faapea ma lo'u agaga. I ia aso ou te le'i iloa e iai so'u agaga. Na ou faapea ifo:

"O se mea ese lenei, lenei tagata e le'i vaai lava ia te a'u muamua, a o lea ua tagi ona o a'u agasala; ae ou te le'i tagi lava ona o ni a'u agasala. O lenei la ua ou faato'a malamalama i lea mea, o lou manatu mamafa i agasala a se tagata e te faanoanoa ai ma e tagi ai. Ou te le manatua ana tala na fai mai, ae ou te manatua le mana i le lima o le tagata sa i luga o lo'u tau'au. E le'i umi ae ta'ita'iina atu a'u i le Malo o le Atua.

mai le tusi: **"God's Generals"** tusia e **Roberts Liardon** faamatalaina e Afemata Apelu Aiavao

Kaino

O Kaino o le atalii ulumatua a Atamu ma Eva, ma o le uso matua o Apelu. Fai mai na talia e le Atua le taulaga na fai e Apelu, ae le'i talia le taulaga a Kaino. Ua loto leaga ai Kaino i lona uso laitiiti o Apelu, ma tupu ai lona ita tele, ma na fasiotia ai o ia. Ma o le fasioti tagata muamua lea i le lalolagi.

Ona fesili mai lea o le Atua ia Kaino, o fea o iai lou uso o Apelu, ae tali Kaino, "Ou te le iloa; o a'u ea le leoleo o lo'u uso?" Ae tali mai le Atua, "Se a le mea ua e faia? O loo alaga mai ia te a'u mai le elele le leo o le toto o lou uso. O lenei, ua malaia oe mai le elele, ua faamaga mai lona gutu e tali a'i le toto o lou uso mai lou lima. 'A 'e galue i le elele, e le toe fua lelei mai ona fua ia te oe; e avea oe ma maumausolo ma faasevasevaloina i le lalolagi."

Ona tali mai lea o Kaino i le Alii "Ua sili la'u agasala, ou te le lavatia. Faauta, ua e tulia a'u i le aso nei ai le fogaelele; o le a lilo a'u ai ou fofoga; o le 'a avea a'u ma maumausolo ma

faasevasevaloina i le lalolagi; ai se maua o au e fasiotia au e ia."

A ua fetalai atu le Alii ia te ia, "O lenei, ai se fasioti ia Kaino, e tauia faafitu o ia."

Ona tuuina lea e le Alii le faailoga ia Kaino, e le fasiotia o ia e se maua o ia. Ona alu atu lea o Kaino ai luma o le Alii, ua mau foi o ia i le nuu o Nota, i le itu i sasae o Etena. O ina na fetau ai ma le fafine na fai ma ana ava. Na maua se la tama ma faaigoa ia Enoka, o le igoa foi lea na ia faaigoaina ai le aai na ia fausia.

O le faailoga na tuu e le Atua ia Kaino, na fai ma lapata'iga i tagata faatupu faalavelave mata'utia ma le faasaua ina ia 'aua ai ona latou fasiotia Kaino. Ma o soo se tagata lava na te fasiotia Kaino, e oo ia te ia le ma'ema'ea o le Atua.

O le faailoga foi na tuu ia Kaino e fai ma lapata'iga i le au faatupu faalavelave ma sauaga mata'utia, e oo lava i tagata e pei o Kaino, lea na ia fasiotia lona lava uso, e faasoa atu lava iai le alofa ma lona agalelei i e e le tatau iai. E le fiu le Atua i amio leaga a tagata; e tatau ai foi ia tatou ona tatou faapalepale ma onosai e pei o le Atua.

O Le Na Tuulafoaiina

The Rejected One Le atunuu Iapani ma le lofi fiafia o l'Atua

mai le itulau muamua
o le Auauna na Puapuagatia, e pei ona tusia e Isaia:

“Ua inosia ma tuulafoa’iina o ia e tagata; o le tagata faanoanoa, ua masani foi ma le tiga; e peiseai ua ‘alo ese mata ia te ia, ua inosia o ia, ma ua tatou le manatua lava o ia.”

O le tele lava o tusi na tusia e Endo sa faavae lava i luga o le manatu - o le tuulafoaiina ma le sauaina. O lana tusi: “*Silence*”, (Leai se Leo), o lana tusi aupito

sili lea ona ta’uta’ua, sa faamatalaina ai le toatele o Kerisiano i Iapani na teena o latou talitonuga faa-Kerisiano ina ua sauaina. Ua faitau Endo i tala e tele o Kerisiano lototetele sa maumaututu lo latou faatuatua ma oti faa-maturo, ae na te le’i faitauina ni tala i le ‘au Kerisiano na faafitia le Alii i taimi o sauaga. O le faalavelave e lei tusia ni tala o le ‘au faalata lea. Ae mo Endo lava ia, o le fe’au aupito malosi o loo aumai i le soifua o Iesu, o lona

alofa le matineia, aemaise lava lona alofa ia i latou na faalataina o ia. Ta’ito’atasi lava ma tu atu ma alu ma fultua mai i le Alii, ae alofa lava iai. Na faasatauroina o ia e lona lava nuu, ae ina ua faalava’au e leai ma se lavalava i se faamaasiasiga tupito na fai e lona lava nuu, ae taumafai a’e lava mai ona puapuaga ma alaga i lona Tama - “Lo’u Tama e, ia e faamagalo atu ia te’i latou, aua ua latou le iloa le mea ua latou faia.”

faaauau itulau e 11

O le Agaga o le Atamai i Gagana

mai le itulau e 5
misionare o Ioane Viliamu ma lona faletua ma la latou faigamalaga. Taunuu mai i Samoa ma talia aloaia ai e Malietoa le Tala Lelei na taunuu i Sapaapalii. O nei faigamalaga i le fita o ala ma le matamataita o le vasaloloa, pe a leaga le tau, ma oo mai matagi ma afatia i afa; o le upu moni lava e taumate pe tua i ni a, pe taunuu foi, pe lagomau i le vasa o le tuugamau le elia.

Peitai o le taunuu i laueleele o le Pasefika ma atunuu na atofaina aemaise si o tatou atunuu o Samoa, na pupula ma faaalua mai ai vavega ofoofogia na saunia e le mana lilo o le Agaga Paia, aemaise o le Atamai o le Gagana sa fesootai ai misionare ma atunuu eseese o le Pasefika mo le tala’ina o le Tala Lelei ia Iesu Keriso.

Ina ua ola ma tupu le Tala Lelei i Samoa ma a’oa’o e Ioane Viliamu nisi o a’oa’o e fai ma faifeau misionare e faa-talalelei ai atumotu o le Pasefika - mai le 1839-1979. O le molimau a le

tama ia Oka Fauolo na faapea ai, **O se galuega o le loimata maligi ma le toto masaa, i nisi o atunuu faapaupau ma le ‘ai tagata. E pei o ni amio a manu, ma o latou uiga e pei e le o ni tagata ola.**

O le faata’itaiga lea na maliu faamaturu ai Ioane Viliamu i Eromaga. Pei foi ona taua i le faamatalaga a le faifeau o Lolagi ma isi e toalua. Ina ua taunuu atu i le motu o Tana, i le malaga faamisionare muamua a faifeau Samoa ma Ioane Viliamu, tausaga 1939. Ina ua tulauleele i Tana, ua toe tuumuli le Savali o le Filemu. Ae feosoi ane tagata ma lomilomi o latou tino ma faapea mai, “UFO Naro! Kamasi”. “Matua momosi ma aulelei o latou tino i le ‘ai.” Ai lava o le alofa o le Atua ma nai upu sa tau nanunanu atu ai, sa fai lea ma laveai ia i latou. E moni e le faigofie, e faigata ma atili ai ona faigata, aemaise o le faigata o gagana eseese sa o latou molimau ai, a o le faalagolago ma le mautinoa i le Agaga o le Atua e maua ai so latou iloa ma se atamai,

e faatino ai la latou galuega molimau i Nuu Ese.

Pei o le isi lea faafitauli tele sa feagai ma o tatou Tua’a Misionare. O le gagana, e talai atu ai le Tala Lelei ina ia malamalama ai tagata. A o se tala fiafia, sa mafai lava e nai o tatou misionare ona lauga ma faatino a latou galuega i gagana eseese a atunuu sa galulue ai. Ua le o se potu ma se atamai o le tagata, a o le fesoasoani mai o le Agaga atamai o le Atua mo le tatou galuega Folafoa o le Tala Lelei. Ou te manatu e lei soona filifilia e tuua ua tofafa mai tia lenei vaitau e toe aofaga potopoto mai ai le Ekalesia. E fetui tonu ma le afio mai o le Agaga Paia ma faatutumu ai lana Ekalesia, e toe faafou ma faatamaoiga i meaalofa eseese, aemaise o le Agaga atamai i le tagata e molimau ma gagana atu ai i le Tala Lelei o le Faaolataga a le Atua. Ekalesia, o lau molimau lava i le Agaga Atamai o le Atua, e to’amalie ma saogalemu ai le galuega a le Atua.

Ua tele faafitauli ma faigata, ua fesagai ma le Ekalesia i nei aso, e le gata i fafo atu, o le li’o o le Ekalesia

faaauau itulau e 10

ITULAU MO TUPULAGA TALAVOU

Papa, e te Alofa ia A'u

mai le tusi:

Daddy, Do You Love Me?

mai le itulau muamua

faamanatu ia i tatou, a faigata ia i tatou ona fo'ia se mea, pe tatou te faaletonu pe o le fea e tatau ona fai, ona tatau lava lea ona tatou tapa i le Tusi Paia ma saili pe se a le finagalo o le Atua. O le a maua mai ai se fesoasoani mo tatou. Aemaise lava i le va o matua ma fanau, ma le sauaina faaletino ma faalemafaufau o fanau. E faamaonia i le tala lenei, e tele lava foi ina tuulafoa'iina fanau e o latou matua, i taimi o o latou mafatiaga. Ma latou tuu fesili ai, pe alolofa ea, pe le alolofa o'u matua ia te a'u?

Fai mai se isi o teine o le tala: "Ou te le iloa pe aisea ua sau ai lava i lenei aso lo'u tama," o le tomumu leotele lea a le teine ina ia lagona mai e tagata o latalata mai ia te ia. "Ai ona e taua ia te ia le faamanuia a la matou aoga. Lelei ua ou iloa ai e taua ia ia le faauuga."

Peitai e ui lava i le tumu o tagata, e leai ma se taumafai o le teine e nana ona foliga inoino ma le matamata ita i lona tama. Ua mafaufau ifo o ia, o le aso lea o le aso mo ia, ae le se aso mo lona tama. A o lea ua sau e pei e taua ia ia. Ua sau na te fia avefa nisi o lelei o lona aso. Ia ua lelei, se'i e vaai la iai pe faapefea foliga o lou afafine i le aso lenei.

E vaavaai solo lava le tamaloa ma savali atu i totonu ae le tepa

mai i le mea o tu ai lona afafine. E foliga le mautonu ona uiga.

Aisea ua e sau ai fua i le faauuga? (O mafaufauga ia o le teine ia te ia lava.) I nei tausaga e tele e te le'i taumafai lava e faafesoota'i mai au a o o'u i lalo i vasega laiti. Lea faato'a e sau lava lea! Aisea? A o o'u mana'omia sau fesoasoani i o'u faafitaluli a o ou i vasega laiti, ae e nimo. O'u fiu e tusitusi atu ia oe o lo'u tama, ma ou tagi i lo'u fia maua oe, ae leai se tali mai i la'u mau tusi.

O le taimi lea, ua le toe manatu le teine i tagata e toatele o tumu ai le faauuga. Ae te'i ua toe vaai atu, ua latalata mai lava lona tama i le mea o iai. Latalata mai i le tino nai soo se isi lava taimi i lona olaga. O lona matamata ita ua pei o se naifi ma'ai ua tutu'i ifo i lona tino.

"Hai."

"Hei."

Ua mata 'ata'ata atu ana uo i le tamaloa ua faalogo soo iai i ona tala a o lea faato'a latou vaai tino iai.

"To'atele tagata ua o mai i lau tou laugatogi. Manaia." O le tala lea a le tamaloa.

Tali le teine, "Ioe, to'atele le mau tagata na ou feiloa'i iai i ia mau tausaga na e tia'iina ai a'u. O isi e o atu e matamata i la'u tenisi i isi aso. E te le'i fia matamata o taalo lou afafine i le tenisi? O isi tagata e telefoni atu i o'u asofanau, ma isi e lafo atu pepa faamanuia mo o'u aso fanau. Ae te le iloa, a ea? Aua e leai sou taimi mo a'u i ia aso ma tausaga. Aea? Oi! leaga e leai se taimi e maua se'i e telefoni ai lava i lou afafine, a ea? A 'EA!?"

"Hon-"

"Honey?!!! Aua e te valaauina mai a'u o honey. Ua fia nei tausaga e te le o ta'ua lo'u igoa? Ua fia? Ua fia!? Po ua fia?! O e manatua lo'u igoa? E te iloa lo'u igoa? Aua la e te faaaogaina le upu lelei e tau faasuamalieina ai le mea leaga. Alu? Alu ese. Alu e te ola i le ituaiga olaga e te fiafia iai, ae aua e te toe taumafai e tosoina atu a'u i le olaga o loo e iai."

Ona liliu atu lea o le teine i ana uo, uo ia sa na o le matamata ma faalogologo e aunoa ma se tala e faia. Fai mai le teine, "Ou te le talitonu, i lona mafai ona nimo i nei tausaga e tele, ona toe savalivali mai lea ma ta'u mai a'u o honey! Pei e leai se mea na tupu."

"O le mea moni lava, ou te le fiafia i le tulafono e lima (oi le Tusi Paia). O isi tulafono ou te malamalama lelei ma ou talia. A o le tulafono lea, e lima, e faigata ia te au ona ou talia. Ou te le talia le tuu faatasi ma isi tulafono e iva. E le gata ina ou le talia le ava i lo'u tama, ae ou te le iloa foi pe faapefea ona ou ava i le ituaiga tagata e iai lo'u tama."

Peitai, e tatau ona ou faaali atu le suiga o o'u lagona, ae ou te le'i faaauauina la'u mataupu, i le faamatalaina lea o le uiga o le upu "AVA" i le fuaiupu lea, ia e ava i lou tama. E sili ona faamatala ae te le'i fiu ma oo ina e fenumia'i i a'u faamalamalama. Aua o lea o le a outou manatu nei e le tatau ona "ava i lou tama."

E le taumate e sa'o outou. Ae le tutusa lea ma le mea moni e finagalo iai le Atua ina ia ava i lou tama. E le o se filifiliga e tau fai. Ia manatua, le taua o le iai o lea tulafono i totonu o le tuufaatasiga o "Tulafono e Sefulu". Ua faatonuina oe e te ava i lou tama ma lou tina. E le o fai mai e fai sau filifiliga pe e te ava pe leai. O le faatonuga, ia e faia. Ma o le mea moni lava, o le agasala lou le faia.

O le a ou faaaogaina le tofa sasaa

faaauau itulau e 9

ITULAU MO TUPULAGA TALAVOU

Papa, e te Alofa ia A'u

mai le tusi
**Daddy, Do
You Love Me?**

faaaauau mai le itulau e 8
a se tasi o failauga iloga o le Tusi Paia e faamalamalama ai le uiga o le ava i lou tama - honor your father, e pei ona tusia e Dennis Rainey i lana tusi: "Moments Together for Couples." "O Nai Avanoa mo Ulugalii".

O le upu ava e tusa ai ma le faamatalaga a le lomifefiloi o le Webster, o lona uiga, o le igoa tausafia pe faaaloaloga. O le faaalua lea o se faaaloalo e tatau ai pe onomea ai. Ina ua faatonuina tatou e le Atua ina ia "Ava i lou tama ma lou tina," o loo iai i totonu se uiga faaopoopo. O le uiga o le upu 'ava' poo le honour i le gagana Eleni, o le no'uno'u ifo i lalo ona o le mamafa o se mea, poo le tele o le ava. E faaupu e tagata Samoa le faaaloalo tele lea e faapea - ua fata luga ua fata lalo.

E manaia lava le faato'a foaina e le Atua o le nuu o Isaraelu, ona o le ava i matua o se tasi lea o maa faavae e sefulu ua faatonuina e faavae ai Isaraelu. Vaai ane faalemafaua i le faavaeina mai o le nuu o Isaraelu. O le ava i lou tama o se tasi lea o maa faavae autu o le nuu o Isaraelu. Ua leva ona nofo pologa i le nuu o Aikupito, a o lea ua ta'ita'iina mai e le Atua i vaomatua o Sinai. Na ia folafola se nuu mo Isaraelu, ae oo mai i lea taimi, na te le'i faaali mai ni faasinoga maumaututu, poo ni

ta'iala e mulimuli ai le nuu. Aua e mana'omia e Isaraelu ni faatonuga e faatonutonu ai a latou amio ma a latou tu ma aganuu e iloga ai i latou o se atunuu ma ona tagata, poo le nuu o le Atua.

Ona aumai ai lea e le Atua mo latou "Tulafono e Sefulu". O tulafono ia na aumai tatou te iloa ai le taua o le 'ava i ou matua'. Matau mai, o tulafono muamua e fa, e faatatau i le va o le tagata ma le Atua. Ona sosoo mai ai lea ma le tulafono e lima. E le se mea soona fai le sosoo o le va o le tagata ma le Atua, ma le va ma ou matua. O le ava i matua e tatau ona tupu mai i luga o le faatuatua i le Atua.

Se'i vaavaai lelei ane lava i le tulafono. O ai o faatonuina tatou e le Atua tatou te ava iai? Na o matua lelei ma le amio lelei? Na o matua Kerisiano? Poo matua ua matutua faale-agaga? Pe na o matua la te le faia lava se mea sese i le faafaileleina mai o tatou? Leai! Ua faatonuina tatou e le Atua e tatou te ava i o tatou matua, tusa lava pe faapefea a latou amio ma o latou uiga. Aisea? Aua o le ava i matua e mana'omia ai lo tatou savavali i le faatuatua ma talitonu i le Atua. O le ava i matua ua faatonuina mai ai le ava o tamaiti uma, poo tupulaga uma i o latou matua, laititi pe matua. E leai ma se isi e tuuese faapito ina ia 'aua le ava.

E tele fesili e tula'i mai i lo'u laga o le manatu lea. Se'i o'u faamatalaina atu. O le ava i matua e le faapea o lou lagolagoina lea o mea sese o fai poo se agasala o fai e ou matua. E oo foi i a'afiaga o mea sese o fai e matua e le tatau

ona tuu ai pea. Mo le tama ma le teine ua matutua, aua le tuua oe e faaaogaina e ou matua i mea sese o la faia. A ia e fesoasoani e faaleleia ni faaletonu o tula'i mai. Faaaoga lou matua e faaleleia ai lou lua va ma matua. Fai ma le faaaloalo aua ua e matua, ma e taumafai e faamatilatila mea lelei o fai e ou matua e lelei ai lou tou aiga, ma lelei ai ou tou uiga ma amio. Ia e tautalatala foi ma faamalo i ou matua ona o faigata na ui mai ai a o faafaileleina oe o se tamaitiiti se'ia oo mai ina e tagata matua. O lou ava i ou matua o lou faafetaia lea o le tele o mea lelei, ma fesoasoani na la faia mo oe, ua e manuia ai. O le ava i ou matua o lou faamagaloina lea o la'ua i ni mea la te sese ai, e pei foi ona faamagaloina oe e Keriso i le tele o ou foi sese.

Na o le tulafono lava "o le ava i matua" o loo piiama mai ai se folafolaga. Ma o ia mea uma, ua suia ai o'u lagona e uiga i lo'u tama, ma ou talitonu ai, o lo'u ava i lo'u tama, o lo'u usitai lea i le Atua, ma faia lona finagalo, e ala mai ai manuia mo lo'u tagata. O lo'u ava i o'u matua, e puna mai ai manuia e le gata mo o'u matua, ae mo a'u fo'i. Matou te taufai manuia ai.

Ina ua ou oo i lenei tulaga, pei ua matuu atu se avega mamafa sa ou tau'aveina ina ua ou malamalama i le mea lea. Ua ou iloa nei, e le lelei ona ou fai ni upu taufaifai ma lau lo'u tama poo lo'u tina i luma o tagata ma faaleaga la'ua. Aua e ui lava ina iai ni o la faaletonu, ae ana leai i la'ua, ou te le fanau mai i le lalolagi, ma maua ai so'u avanoa ou te ola ai i le lalolagi, ma maua ai avanoa ou te manuia ai ma ou fiafia, ma ou fesoasoani ai i o'u matua, ma isi foi tagata.

Mai le tusi: "**Daddy, Do You Love Me**" - tusia e Ariel Allison ma Shelby Rawson faamatalaina e Afemata T. Apelu Aiavao

ITULAU MO TUPULAGA TALAVOU

La'u Tamateine i Alatetele o le Aai

mai le itulau muamua

lava e pei e leai se mea ogaoga o tupu. E faapefea ona ou tuu atu lau tamateine e sefulufitu tausaga, e tu atu ma alu ese atu ma lo matou aiga? Alu i fea? Na te le malamalama i faigata o le a fetai'a i ma ia. E le taumate e oo ina moe i lalo o se aualalaupapa, poo se poletito. E leai sa na tupe e faatau ai sa na meaai. Ae faapefea pe a toso o ia e se tagata leaga amio mataga? Leai, ou te le tuuina la'u tama e alu ese atu faapea ma lo matou aiga.

Ua faatau'e'e mai lo'u mafaufau, ae le o tautala o'u laugutu i ni upu. Ou te talitonu na tautala lo'u to'alua e tusa ma le finagalo o le Atua, ae le talia e lo'u mafaufau.

Na o lo'u vaavaai atu lava, o fafao lavalava ma isi ana meatotino i tagapepa 'i'ila, ma lafo atu i fafo o le faamalama o lona potumoe o lo matou fale.

O le Agaga o le Atamai i Gagana

mai le itulau e 7

e pei ona iai le mataupu o le Lafoga, o galuega mamafa e fai i le Aso Sa - a ua leai se leo o Ekalesia, ae faapea foi i le lotoifale o Ekalesia i galuega faale-Matagaluega ma Pulega, e oo foi i Ekalesia i nuu ma alalafaga taitasi.

O le a sou finagalo?

Ia manuia le Fono Tele o lenei tausaga 2018.

“Misele,” o la'u augani lea, “faatali se'i oo taeao. E oo atu taeao ua sui lou loto.”

“Leai, e le suia. Ua ou fia alu, ma e leai se mea e te mafai ona e faia e toe suia ai lo'u mafaufau!” Ma togi atu lava i fafo ana taga lavalava, ma tele'a'i atu i fafo ma lo matou fale.

Na o le lima minute talu ona alu Misele, ae sogi mai lo'u to'alua ia te au, ma faatofa mai o le a alu i lana galuega i le fanua maliu. Na faalagolago atu lo'u ulu i le faitoto'a ua tapuni mai, ma ou tagi masusu, a ua tete ou tino. Ou te le iloa pe o le a le umi na ou tu ai i le faitotoa, ae ua matua tiga lo'u loto, vaivai, ma ua ou le iloa se mea e fai. E oo lava i le tatalo ua le mafai ona tautala iai. Na ou savali atu i lo'u moega ma ou faapa'u iai, ae ua le mafai ona ou moe. Ua faasolo ata o la'u tamateine i lo'u mafaufau.....poo fea o alatetele o iai, na o ia.

Na ou te'i a'e i luga ina ua tafa mai ata. E oo mai i le taimi lea e le'i faia lava sa'u tatalo. *O le a le ituaiga tina e iai a'u?* “Le Alii e, faamagalalo mai a'u. Ua ou le iloa pe o le a le tala e fai atu.”

“E leai se mea o iai Sandy,” O la'u faalogo lea i le ta ta mai o lo'u fatu. “E to'atele tagata o tatalo mo lau tama.” Na faamafanafana mai le manatu lea ia te au, ae ou te le malamalama lelei iai. “O ai o tatalo?”

O aso na sosoo ai e pei ou te miti savali i le 'ea. Ua le mautonu lo'u

mafaufau, ua saputu mai foi le mau fesili i lo'u mafaufau. “O fea o iai la'u tama? Aisea na alu ai? O le a so ma sese ma lona tama?”

Na ou ala a'e i le vaeluaga o le po, ua ta le 3am, ma ou fesili ifo, “E te iloa o fea o iai lau tama?” E le taumate a na lava so'u faatuatua, pe ou te tatalo soo, e le taumate lava le iai pea o la'u tama i lo matou fale, ma saogalemu ai.

O le Aso Lulu na sosoo ai, na faafetaui mai ai a'u e la'u uo o Judy i lo matou falesa ma fai mai, “Sandy, o a mai Misele. Sa ou mafaufau lava iai i ia aso ua te'a atu, aemaise lava le taimi tusa o le vaiaso talu ai, o le Aso Tofi i le po. Na ou ala ai ma ou manao lava ou te tatalo mo ia.”

Na ou te'i i le faamatalaga lea. E faapefea ona ia iloa o loo manaomia ni talosaga mo la'u tama? Ua tele masina ou te le'i fetau lava ia Judy, ou te le'i talanoa foi iai e uiga ia Misele.

“Ou te le iloa poo faapefea mai la'u tama. Na alu ese ma lo matou aiga i le po o le Aso Tofi, ma e ou te le'i toe maua mai ai lava se tala.”

Aso Tofi?! O le aso lea fai mai Judy na fia tatalo ai mo Misele.

Ua ou faalogo fai mai e oo lava i le mapuea o le tagata i ona puapuaga ma mafaufau i le Atua, e lagona mai lava e le Atua. Mata e moni e lagona mai e le Atua le oi o lo'u loto i o'u mafatiaga?

Ina ua tago mai Judy ma 'u'u faatasi atu o'u lima e lua ma tatalo, na ou lagona lava o loo ia iloa lelei atu, atugaluga o lo'u loto, ma lo'u agaga. O o'u sese. O o'u tiga. Pei o le fala e fofola i le malamalama o le la. Ae ui lava i lea, a o maligi ifo ona loimata ma pa'u'u i le elele, ma filo ai ma o'u fo'i loimata, na amata ai ona ou lagona le filemu o le Atua ua filo faatasi ma le gaogaosa o lo'u mafaufau. O le taimi lea na oo mai ai le malamalama ia te a'u, ma ou iloa ai, o le taimi lava tatou te vaivai ai, e valaau ai le Atua i isi tagata e

faaauau itulau e 11

ITULAU MO TUPULAGA TALAVOU

La'u Tamateine i Alatetele o le Aai

mai le itulau e 10

tatalo mo tatou i itula o matagi ma afa o le olaga. O le mapuea lena na ia folafola mai.

Na ou te'i ua tolotolo mai le isi a'u uo i o'u tua, o Robyn, ma musumusu mai, "Ou te le iloa pe te talitonu pe a ou fai atu ia te oe, na ou talanoa i lau tama i nai aso ia ua te'a atu, ma ou iloa ai, e matua alofa lava ia oe. Ioe, e matua alofa lava Misele ia oe." Na ou tago atu

ua opoopo mai Robyn, e pei ona ia fusi atu a'u ina ua ma faato'a feiloa'i. Na ou augani i le Atua i le taimi lea ina ia alofa ma faamagalō mai au ona o o'u vaivaiga. Faapea au e leai se isi e alofa ma fia fesoasoani mai ia te a'u. Na ou faafetai foi i le Atua ona o au uo. Ae o tatalo a Judy ma le faalototele mai o Robyn, o faamaoniga ia o loo iai lava tagata, poo uo, e alofa ia te au ma la'u tama. Ou te talitonu o

loo iai foi ma nisi o loo tatalo mo ma'ua ma la'u tama, ae ou te le o iloa. Ae na fai lea ma mea ou te to'afilemu ai ma mafanafana i aso na sosoo ai.

Ma ua tuu nei la'u tama i le alofa tausī a lo'u Alii e fesoasoani i taimi na te mana'omia ai. Ou te talitonu foi, e le o tuulafoaina e le Atua la'u tama i le mea o iai, poo fea lava o iai la'u tama, o loo iai foi ma lo'u Alii.

O Le Na Tuulafoaiina

The Rejected One

Le atunuu o Iapani ma le alofa faa-tina o le Atua

mai le itulau e 7

E talitonu Shusaku Endo ua le mafai e le lotu Kerisiano ona liua le toatele o tagata Iapani vagana le na o le tasi le pasene, ona na o le tasi le itu lea ua malamalama iai tagata Iapani, o tala i Kerisiano Iapani na oti faamatuuro, ae le o faalogo i le isi itu. Ua matamata tagata Iapani i le matagofie o malumalu tetele Kerisiano i Europa e pei o le Chartres ma le Westminster Abbey ma pu'e mai ata o ia malumalu tetele, ma isi mea matagofie na faia e Kerisiano. Ua peseina foi e aufaipese Iapani pese pei o le "The Messiah". Ae o loo misi lava i tagata Iapani le tasi feau mai Kerisiano: o le tala i le Atua ua na le faia se mea a o tagi lona Atalii ma aga'i atu i Ierusalemā i lona faasalaga i le oti. Ua misi atoa i tagata Iapani le fe'au: o le Atua ua na tuu o ia i le tulaga na te le mafai ai ona fai o se mea; ma le Atalii o le Atua o aga atu i Ierusalemā mo lona faasalaga.

O le manatu o Endo, o Iapani, o se atunuu e tele lava ina pulepule tutuina e tamaloloa tagata ma aiga ma ulugalii, ua malamalama la latou i le itu faatama o le Atua; ae le'i malamalama i le alofa faa-tina; le alofa lea e faamagalō ai sese, ma fusifusi manu'anu'a, ma tosina mai tagata ia te ia. ("Ierusalemā, Ierusalemā e, o le fasioti perofeta ma fetogi i maa i e ua auina atu ia te oe; ua tele lava o'u manao e faapotopoto i lau fanau, e pei o le moa ona ofaofata'i i lana toloa'i i lalo o ona apaau, ae le mafafai outou..

E le na o Iapani e mana'omia lea fe'au magalua. E tatau ona tatou manatua uma: E lua faailoga faa-Kerisiano e tatau ona faalauiloa atu i le lalolagi: o le satauro, ma le tuugamau tuufua. O se tuugamau tuufua e aunoa ma le satauro e misi atoa ai le ute o le fe'au o le Tala Lelei. E pei ona taua e Endo, o loo ofoina mai e isi lotu se atua e malosi ma faavavau; ae na o Kerisiano o

loo latou ofoina mai le Atua na liutino tagata, ma puapuagatia ma maliu. O le Auauna e le'i tupu fua ona tiga. "Na manu'a o ia ona o a tatou solitulafono, ua momomo o ia ona o a tatou amio leaga." I le ala na ia uia i lona soifua ma lona maliu, na ia tau'ave ai tuulafoa'ina uma, ma to'ilalo uma, faapea ma tagata agasala uma. Toatele alii ma tamaitai na ola, ma alofa, ma feoti. Ae na o le toatasi na toe tu mai le oti ma lana folafoloaga na te faato'ilaloina le oti e faavavau, ma na faafou mea uma.

O loo tatou tapuai i le Keriso toe tu. O loo tatou tapuai i le Keriso na faasatauroina. O se isi lava mea, e le lava mo lo tatou faaolataga. #####

E tele lava mea leaga e oo i le ua amiotonu; ae laveaiina o ia e le Alii ai ia mea uma.
Salamo 34;19

Le Alii e, ta feiloa'i i le Potu Talavalava

Na o a'u o se Kerisiano fou i le tusa na o le iva tauaga talu ai, ae ou faalogo i le upu, "potu tatalo," ma amata ai ona ou lagona lo'u faatauva. E ono fai mai se isi faapea, "Ua sola i lona potu tatalo e sasaa ai ona lagona i lona Alii." O le mea moni lava ou te mana'omia lava se potu tatalo e fai ma ou sola iai, pe ou te mapu iai. O le mea lea ou te faanatinati ai lava i le fale, ma su'e se avanoa e mafai ona fai mo a'u, na o a'u. Ae ona o le toatele o tagata i le fale, ou te le maua ai lava se avanoa ou te na o a'u ai, tusa lava pe laitiiti pei se atigipusa seevae le tele!

Ao se tasi aso, a o o'u talatalaina totini sa gaugau ma ta'ai'ai, ma sauniuni mo le masini talavalava, na ou tatalo ai, "Le Alii e, e iai se potu tatalo mo a'u i se mea? O le a le uiga moni o lea upu, "se taimi paganoa?"

"E te le o tatalo nei?" Pei o se faaaliga ia upu ia te a'u. Pei se ata e leai ni ona upu.

"Ioe, le Alii e, peitai..." Ona amata masaa mai ai lea i lo'u loto le anoano o mea ou te le'i iloa o loo iai. Ou te le'i tau ta'ua i le Alii lo'u mana'o ina ia avea a'u ma tagata e aupito sili ona lelei, ae ese lo'u le taitai ona ou oo i le mea e sili ona lelei. E le tau ta'ua i le Alii, aua ua ia silafia. Ae ona o le la e faafofoga mai, e sili ai ona ou ta'ua loa iai.

Na faamalalama mai ia te a'u, o le tina o se tamaitiiti e tevateva lana savali, e ese mai le toatele o isi tina. Na faamafanafanaina o a'u, ma ou lagona le alofaina o a'u. Alofa mai tusa lava poo le a le ituaiga tagata e iai a'u. Ona ou tagi ai lea, pei lava na ou 'ata fo'i. E anoanoa'i a'u tatalo na fai, faapea foi ma tagamea, faato'a uma ai le ma feiloa'iga.

Ma avea ai lo'u potu talavalava ma potu tatalo. Ma o le potu lea ma te feiloa'i ai ma lo'u Alii a o le'i ala mai tamaiti i le taeao, ma

isi avanoa e maua. Pe a la'u mai lavalava mai le 'ato i le masini talavalava; mai le masini talavalava i le masini faamago; mai le masini faamago i le 'ato ma soo ai le taamilosaga. I le ta'i luasefulu minute o taamilosaga ia, sa maua ai o'u taimi paganoa.

O la'u tama o Ionatana, ua fa nei ona tausaga, o ona uluai tausaga e lua sa ave soo ai i le falema'i ma te'a mai i tua, ma toe ave foi. O lo'u potu talavalava, ma ona fe'au felavasa'i, faapea ma taeao o feiloa'iga ma le Atua i talosaga, ua fai nei ma mea e sili ona ou mapu

ai, pe a ou avanoa mai taimi ou te asiasi ai i la'u tama i le falema'i.

E le malamalama tagata e vaai atu i lo'u taunuu mai le falema'i i le asiga o la'u tama, o'u faasasa'o loa i le potu talavalava. E faapefea ona ou faamatala iai le suiga o le potu talavalava i se mea e sili atu ona taua ma lelei mo a'u? O le potu tatalo. O le mea faapitoa ma te feiloa'i ai ma lo'u Atua i talosaga?

O iai ni tina o o latou potu tatalo o pakete ma pulumu fulufale? Poo la'ausu'isu'i ma lavalava mo le su'isu'iga; poo potu talitelefoni ma uaea felavasa'i solo; poo le potu malolo i le fale e tumu i tamaiti fetamo'ea'i ma tapisa? Ou te talitonu e iai lava avanoa i soo se mea mo se potu tatalo, pe a e faaavanoaina lua te feiloai ai ma le Atua, i talosaga

O Fiapito ma lana Tata

E te Selesele i mea na e Luluina

O Fiapito Lepou, o le tautai lea a lo matou nuu i faiga faiva a taulele'a, e fapea ai foi ma le aufaiva masani a swe vaega o tamaloloa e toafitu a le matou lava nuu o Vailoa, Palauli.

O se tamaloa tinoese, lapo'a talaulau lona fuitino, e fa'i o le tele o lona tino, ae faapena foi ona tele ma lapo'a o lona paopao. Ae aupito sili ai lava ona tele lana tata, pei se tele o se apa fafano o nei aso.

Ta te ofo llava i se popo lapo'a faapea sa maua i na aso, lea sa fai ai le tata o le paopao o Fiapito. O ia o se uo mamae a lo'u tama. I aso o o'u laitiiti lava, masalo pe a ma le sefulu tasi pe sefulu lua foi ou tausaga. Sa masani ona ou vaai ai ia Fiapito ma isi tamaloloa o le latou aufaifaiva o potopoto mai i lo matou aiga pe a mae'a 'aiga afiafi a aiga o le nuu. Sa potopoto mai i lo matou faleoo, ona tafu lea o le afi ipupopo i le ogatotonu o le faleoo e fai ai le latou alalafaga.

E fiafia tele la le aufaiva lea i le potopoto mai i lo matou aiga, aua foi e maua fua ai le tapa Samoa, e fai ai le latou ulaulaga tapaa Samoa, ona sa fai la matou toga tapaa i o matou fanua o Talalelei, o loo i gauta o le pitonuu o lo matou nuu e igoa ia Nuualofa. E fai foi la o le maua fua o le tapaa, a o le maua fua o le ipu koko Samoa, mai se koko sa fai e lo matou tina. Sa ou fesilisili pea i lena vaitaimi poo le a le mafuaaga o le fiafia o nei tamaloloa e o mai i lo matou aiga i le tele o po o le vaiaso. Faato'a ou iloa mulimuli ane, o le fauga pa ma le oloina o a latou pa, atoa ma le fauina o pulu mamafa e lo matou tama aua o lana taleni lea sa faamanuiaina ai o ia e le Atua. O le faupa, faafulu pa, fau pulu mamafa, su'i upega tauta ma su'i upega tili Saina. E leai lava se mea faifaiva e le mafai ona faia e lo'u tama, ma o ia foi o le tagata o le

faaauau itulau e 13

O E UA FAI'ILAGI LE FOLAUGA

**Le'aupepe Taupa'u
Lita Su Makesi
Neemia
20 Aperila 1965-13 Setema
2017**

"E fiafia le tagata e tumau, e ui lava i tofotofoga aua a uma ona tofotofoina e le Alii ia i latou o e alolofa pea ia te ia." Iakopo 1:12. Ua tatau ma onomea nei upu a le aposetolo o Iakopo e fai ma manulauti e faamatalaina ai le soifua galue ma le soifua tauivi o lenei tamaitai tiakono i le atina'eina o si ona aiga, ae tainane lo matou galulue ai e atia'e le galuega paia a le Atua. Pe a fua i lona tulaga tamaitai, e leai se toalua, leai se fanau, ua matua

oti foi o ia se'i tulou le gagana, sa faatina iai lona aiga, i nai ona tuagane ma nai ona uso i Samoa nei, ona matua maofa lava lea o le loto ma le mafaufau i le loto toa, le ola sogasoga ma le saili malo o lenei tamaitai sa ia asaina le fita ma le faigata o le soifuaga nei.

Sa faa-Ekalesiaina i le aulotu EFKS i Suga, Vailele. O le taimi tonu foi lea o le avea ai si ona tama o Su Makesi Neemia ma pule o lea faato'aga a le malo i ia ona aso. O Taupa'u Lita e faapei ona sa iloa tele ai o ia, sa galue i le Esetete Tausi a Samoa, le TV Samoa, ae faaii i le Faalapotopotoga Tumaoti o Elele o Samoa -(Samoa Land Corporation Ltd), lea sa avea ai o ia ma failautusi faapitoa (private secretary) o pule sili o le

faalapotopotoga mo ni tausaga se tele.

Ina ua tau faamaopoopo ni tagata mo le amataina o se aulotu i Nuufou nei, o ia lava faatasi ma lona pule sili, Afioga Peseta Afoa Arasi Tiotio, o le sa la galulue i le pulega o le SLC i lea vai taimi, sa ofoina mai ina ia matou galulue mo le faatuina o se aulotu fou i fanua o le SLC i Falelauniu nei. Ina ua maua mai aiga e amata ai le lotu, o ia lava le uluai failautusi safilifilia i le uluai fono a matou. O se tamaitai sa ofo atoatoa mai lona soifua, ma lona malosi i ala eseese uma lava sa ia mafaia ma gafatia e atinae ai lenei aulotu, mai lava i lona faatuina i le aso 4 Novema 2012, seia oo ina faataotolia o ia i se gasegase

faaauau itulau 16

O Fiapito ma lana Tata

E te Selesele i mea na e Luluina

mai le itulau e 12

sami ma soo se fagotaga e fai ai.

O le masani la a le 'au faifaiva lea, a mae'a tapenaina a latou mea fagota, ona pese lea o se latou pese lotu, ma fai se latou tatalo, ona faato'a gasolo ifo lea i lalo i le taligalu o loo faafao ai o latou paopao, ma sauni loa mo se latou faiva i lea po. A le o se uauaga malau, o se tiuga malie, poo se matauga filoa, ia ma isi lava mau faiva eseese ua masani ai latou. O le au faifaiva lea sa a'e ai se agaga logologoa ma le tausua ai o tagataa o lo matou nuu i lona vaitaimi ona o le gagana a le tautai, le tamaloa o Fiapito. O le masani a le au faiva, o i'a uma lava e maua i o latou faiva e ave uma i le paopao o Fiapoto. E faato'a faasoa mulimuli

lava i'a o le latou faiva pe a oo ina o le a taliu i uta le latou fagotaga.

E iloa lelei lava e Fiapito le sa faamaoni i le faiga o le faiva, ma le sa pipi'o, ma le faamaoni i le faatinoina o le faiva. Aua e iai i latou e fai atu lava le faiva, ae o loo moe faasasa'o lava i luga o latou paopao, ua lafo le taula i le aau ae matua malolo lelei lava. O ituaiga tagata foi ia e faamoemoe e su'e a latou mea i le malosi o isi tagata. A le o lea foi, ua le faamaoni i le aumai o i'a uma o o latou faiva i le tautai. I latou ia ua iloa lelei lava e Fiapito lo latou pipi'o. O le taimi lava e faalepa mai ai o latou paopao ia Fiapito, ona faapea lea o le tala a Fiapito, "Ia alii, o si au pipi'o lava ma si au tata." O le uiga o le tala a Fiapito,

afai lava sa e le faamaoni i le faiga o le faiva, e na o le pau foi lona o i'a e te maua, lea ua asu atu e lana tata.

Ta te mafaufau foi ita ia i le tala lenei a Fiapito, ai lava e faapeafoi le saunoaga a le Tautai o Tautai, le Alii o Iesu pe a oo ina tauia taitoatasi i tatou e tusa ma a tatou galuega sa faia mo ia ma lana Tala Lelei. "O le fua lava sa e luluina o le fua foi lona e te seleseleina."

Tau ia ina ia a'oa'o mai le tala a Fiapito ma lana tata ia i tatou le aufaifaiva a Iesu, ina ia o tatou manatua e iai taimi o seleselega, taimi o le tauia o le tagata ma lana sa fai mo Iesu ma lana galuega pa'ia o loo o tatou auauna iai. "O si au pipi'o ma si au tata." -

O se tala e manatua ai si o'u tama ia Aloia Poufa Pesaleli ma si ana uo ia Fiapito Lepou, o ni tagata o le sami ma a latou fagotaga sa faia ai.

tusia e

Letaulau Poufa Pesaleli FS
EFKS Nuufou Faleata

O E UA FAI'ILAGI LE FOLAUGA

**Temukisa Peleti
Tuisalega Semu
16 Aokuso 1935-13 Mati 2018**

Sa fanau i Lauili le nuu o lona tama i le aso 16 Aokuso 1935, ae maliu i lona maota i Vaitele-uta ina ua gagaifo le la i le itula e 2 i le afiafi o le Aso Lua 13 Mati 2018. O ona matua o le faifeau Samoa o Rev. Peleti To'ailoa ma Iulieta, o e sa galulue i le galuega a le Atua i le tele o nuu ma afio'aga i Samoa nei atoa foi ma Niu Sila, faapei ona lau sialfia ai e le aumatutua o le EFKS. Sa faaipoipo atu ia Tuisalega Semu Mata'utia o Fogasavaii ma Fai'a'ai, ua maliliu.

O Tuisuga o se tiakono, o se a'oa'o fesoasoani, mo ni tausaga se tele mo le aulotu EFKS i Fogasavaii. Sa avea foi o ia ma Tiakono Toeaina o le Matagaluega a Faasaleleaga. Sa avea ma faipule o le Malo o Samoa mai le Itumalo o Salega. O ni tofiga sa ausia ma oo iai le tama o le aiga, ona o galuega lelei sa lautua mai ai le tautua le 'alo ma le auunaga faatina a leni tina. Sa galulue lava i la'ua ma le tama i o la tofi ua ta'ua, i le aulotu ma le Ekalesia EFKS i Fogasavaii. Peita'i ina ua tuumalo Tuisalega, sa faaauuina loa e ia lo la tofi tiakono mo ni nai tausaga. Ina ua faatauina lo latou fanua i Vaitele-uta e le fanau ma fausia ai lo latou fale, o le mafuaaga lea o le see mai o leni tina ma nisi o le fanau e nofoia lo latou nofoaga fou i Faleata nei. Ua lagaina la matou aulotu fou i Nuufou nei ma faatuina i le aso 4 Novema 2012, o leni lava tina atoa ai ma si ana fanau, o nisi ia sa avea ma uluai matafale faavae o leni aulotu fou.

O se tina tausafia ma le le lagona lona leo pe a mafuta le aulotu i le tele o ana fonotaga. Ae a oo ina saunoa i sona finagalo faaalua, e matua 'anoa, taualoa ma tele sona sao taua, mo ni faaiuga

fai a le alulotu e tasi iai. Ina ua sailia ni tiakono faavae mo le Ekalesia, o si ana tuualalo lava na tuuina mai, ina ia faaseetuagalu ia mai lea tofiga, ae tuu iai si ana tama o Peseta Malelega Tuisalega. Ma sa faapena lava ona faia e tusa ona ia finagalo i ai.

E to'aiva ia te ia le au matutua o leni aulotu fou, to'alua tama ae to'a fitu tina. O le ta'uaina o le 'au matutua, o i latou ua sili atu ma le ta'i 75 tausaga le matutua o o latou soifua, ma o i latou lava ia e faapitoa iai la'u asiasiga i taeao o Aso Tofi o vaiaso ta'itasi, i le faia o le tatalo faatasi ma la'u upu faamanuia mo i latou. Soo se aso lava ou te asiasi atu ai i leni tina, atoa foi ma le au matutua ua ta'ua, ou te taunuu atu i o latou fale a ua leva ona sagisagi faatali mai mo le oo atu o le latou faifeau. Tasi leni tina ma ana fautuaga, tima'iga ma ana upu faamanuia e tuuina mai pea ia te au i soo se taimi ma te feiloai ai, e faatuputeleina ai lo'u fiafia ma le malosi e fai le galuega e pei ona valaauina ai a'u ma le toalua mo leni aulotu fou. O lana fautuaga e aupito sili ona leo tele, ina ia vave ia ona faia se malumalu tapuai o le Atua mo la matou aulotu se meamanu o maua lo latou malosi e fai ai. O le pine o lena fautuaga faa-tina, e faato'a fa tausaga le matua o la matou aulotu ae faama'ite loa le fausiaina o le malumalu, pei ona iai i lona tulaga ua iai nei.

O se tina tautua mae'ae'a ma fai taulaga lelei mo le lotu, o le mafuaaga o le manuia o si ana fanau i faamanuiaga e tele a le Atua ua 'ae'ae ai nei i latou. Ua avea nei si ana tama o Peseta Malelega ma uluai A'oa'o Fesoasoani o la latou aulotu i Faiaai. A o le itu sili ona faafiafiaina ai lona loto, ma lona mafaufau, ona ua iai lona suli mo le galuega a le Atua, le a'oa'o i'u mai Malua o Auatama Iese, o le tama a lona alo tama'ita'i o Avealalo Leituala Iese, ma o loo sueina lona faailoga faa-fomai mo le Mataupu Silisili i le Iunivesite

o Sini Ausetalia. E to'a 9 lana fanau, ono teine, tolu tama. O fanau a lana fanau e to'a 20, a o fanau a fanau a lana fanau e to'a lima. O lona uiga e to'a 34 i latou na tutupu mai ia te ia. Sa maliu filemu o ia i lona maota i Vaitele-uta ona o se gasegase kanesa sa faata'otolia ai o ia.

O le taeao lava o le Aso Lua, aso 13 Mati 2018 sa asiasi atu iai si ona tuagane faifeau malolo ia Peleti Toese Toailoa (FT). O le taeao foi lea sa feagai ai o ia ma le luluti o ona tiga. Ai lava sa faatalitali Tisa sei oo atu si ona tuagane la te teiloai. Fai mai Peleti, e taunuu atu ua toto tiga o si ona tuafafine, ma o lana upu mulumuli ia te ia: "Tisa a o e lagona mai, ia faasagasaga atu nei ou mata i le lagi i lou Alii o Iesu lou Faaola. Lale e fofola mai ona 'a'ao, 'a'ao o le alofa tunoa, 'a'ao o le faavavau e talisapaia lou agaga. Alu ia ma le fiafia; alu ma le mautinoa; o loo faatalitali mai lou Matai. Tofa Tisa."

O ana upu faamavae ia i si ona tuafafine. E le'i pine lava ae to lana manava ua faatofa mai.

O ona sauniga faaleaiga sa faia i le matou malumalu i le itula e 5pm, Aso Lua, 22 Mati 2018. O le faifeau penisione lava ia Peleti To'ailoa Peleti FT sa ta'ita'i. O Auatama Iese (a'oa'o i'u mai Malua, sa faitauina le Tusi Paia. O Mose Galuvao FS sa tatalo, a o Simeona Taefu FT sa faia le upu faamafanafana. O le Aso Lulu, aso 23 Mati 2018 i le itula e 10 sa faia ai ona toe sauniga i le matou malumalu. O Faauuga Mata'utia FT, o le Toeaina o le Pulega a matou i Faleata-i-Sisifo sa taitai ma faia le tatalo, a o a'u (Letaulau) sa faia le molimau faaleagaga ma faitauina le Tusi Paia. O Faasavala Leilua FT o le faafeagaiga ma le faifeau a le tina i lo latou nuu o Faiaai, sa faia le isi molimau faaleagaga ma le lauga. O le molimau a le fanau sa saunia lea e Toleafoa Tulemoe Tuisalega AF. A
faaauau itulau e 15

O E UA FAI'ILAGI LE FOLAUGA

mai le itulau e 14

Temukisa Peleti Tuisalega Semu

16 Aokuso 1935-13 Mati 2018

o le molim au a tuagane ma ona
uso ma lona aiga, sa faia lea e le

Mualavau Peseta Taofiga Sealii

16 Oketopa 1925-18 Aperila 2018

Tausaga o le soifua 93. O le tinā
ia Mua o le tinā matua lava lea o
le Ekalesia faapea le nuu Toe
Iutaia o le matou nuu. Ua malii
le afioga i le tiakono ia Peseta
Taofiga Sealiimalietoa, ae sa
faapea lava ona auauna le tinā i

Peseta Taala Paulo Gataifale

28 Mati 1963-3 Fepuari 2018

Tausaga o le soifua na malii ai 55.
O le Susuga i le A'oa'o Fesoasoani
o se tamalii sa galue i le galuega o
le Faia'oga. Ua so'o si o tatou
atunu'u o galue ai i lea auaunaga
ma ua tele foi lona sao i le
a'oa'o oina o tama fanau a le
atunu'u. E faapea foi si o matou

Samoata Tulaga Vaana

10 Oketopa 1936-4 Aperila 2018

Tausaga na soifua ai e 81. O le
afioga i le Tiakono o le tasi lenei
o tamā matua o le Ekalesia
aemaise le afioaga. Sa feagai
lenei tamā ma le
faatafagasegase o le stroke ma
faataololia ai loa lenei tamā i
lona laoa. Peitai e ui i le le
atoatoa o le malosi, ae e valaau
lava lona matai o loo auauna

Faifeau Penisione ia Peleti T.
To'ailoa FT. O ona sauniga i lona
oliolisaga tumau i lo latou fanua i
Vaitele-uta,sa ou taitaiina lea.

Ona matou faamavae atu lea ia
te ia i le pese masani a le 'au
Kerisiano, le pese e 268, Talofa
uso e, tofaina oe. Ua sau le itupo
e malolo. E ala oe pe a mavae le

totonu o le galuega a le Atua. E
fa'amanava e le Atua galeuga a le
tinā, o loo faapea lava ona galue i
totonu o le mafutaga. E 10 alo o
lenei tinā, 43 fanau a fanau ae 61
fanau a fanau a fanau. O se tinā
sa galue i ona tiute i le faamaoni
ma le amiotonu.

O ona toe sauniga sa faia lava i le
malumalu EFKS i Puapua. O le
Susuga i le Tausi Matagaluega
Ekalesia Metotisi, Susuga Maaola
Amituanai sa molimolina le sa o

nuu. O se tamalii sa tele meaalofa
a le Atua sa faamanuiaina ai lona
soifua. O le a'oa'o fesoasoani o
le faiaoga Aso Sa, o le ta'ita'i o le
Aulavou, sa faapea ona taumafai
ai mo le Atua ma le galuega a le
Atua. O ona toe saunia sa faia
lava i le malumalu o lana Ekalesia
EFKS i Puapua. Ta'ita'i le Susuga
i le Toeaina o le Pulega Susuga
Kaleve Leifi (FT), Talosaga na
saunia e le Susuga ia Faataualofa
Taefu (FS), a o le Lauga na saunia

lava i totonu o le Ekalesia. O se
tulafale sa ta'ita'i ina le nuu. O se
tamā sa finau i ona tiute ma faiva
ma le naunautaiga ia manuia le
Ekalesia aemaise le nuu, o se
lumanai manuia.

O ona toe sauniga na saunia lava
i le malumalu o lana Ekalesia
EFKS i Puapua. O a'u na ta'ita'ia
le sauniga, Faitauina o le Tusi Paia
le Susuga i le Epikopo Tamasone
Feliua'i, Talosaga na saunia e le
Faifeau Katoliko ia Pule Lio o le
Lauga na saunia e le Tausi

po. Tofa! Tofa! Tofa loa Tisa. Ia
manuia lau malaga. Ma ia tatou
toe feiloai i se aso.

Rev. Letaulau Poufa Pesaleli FS
EFKS Nuufou, Faleata

le tinā i totonu o le malumalu, o le
Susuga ia Pule Li'o o le
Fesoasoani Ekalesia Katoliko na
faitauina le Tusi Paia ao le Susuga
i le Epikopo ia Tamasone Feliuai
sa saunia talosaga, ae o au na faia
le Lauga ma le upu faamafanafana.
Na molimau sui o le aiga ma fanau
ae ou faaiuina i le molimau faale
agaga, ona matou faaiu lea i lona
oliolisaga tumau. "Auā o lo'u ola
ua ia Keriso lea; a'o lo'u oti o lo'u
manuia lea."

Saunia: Aperaamo Tufuga (FS)
EFKS Puapua.

e le Susuga ia Feterika Motu (FS).
O molimau o sui o le Aiga ma le
fanau, na molimau foi le Susuga i
le Sui Failautusi a le Pulega,
Susuga Alofa Ale (FS) ae o'u
fa'ai'u i lona molimau faaleagaga.
"Le auauna lelei ma le faamaoni,
ulufale maia i le fiafia o lou Alii."
Na faaiu i lona oliolisaga tumau i
le pese faamavae: "Tofā uso
Tofāina oe, Tofā, Tofā.

Saunia: Aperaamo Tufuga (FS)
EFKS Puapua

Matagaluega Ekalesia Metotisi,
Rev Maaola Amituanai. O n a
matou faaiu ai lea i lona oliolisaga
tumau. "Amuia ē ua oti, o ē ua oti
oi le Alii"

Saunia: Aperaamo Tufuga (FS)
EFKS Puapua.

O le laulaufaiva o e
popoto e faafiafia tagata
i le poto; a o gutu o e
valelea e luai mai ai le
valea.


Faata'oto 15:2

O E UA FAI'LAGI LE FOLAUGA

mai le iulau e 15




**Temukisa Peleti
Tuisalega Semu**



**Mualavau Peseta
Taofiga Sealii**



**Peseta Ta'ala Paulo
Gataifale**



**Samoata Tulaga
Vaana**

mai le itulau e 13

**Le'aupepe Taupa'u
Lita Su Makesi
Neemia**



tuga i le amataga o le tausaga 2016. O ia o se tasi o tiakono faavae o lenei Ekalesia. Sa le mafai lava ona aveesea lona tofi failautusi a o gasegase o ia i aso e tele ona o lo matou aloa'iaina

o ia o se uluai failautusi o lenei aulotu, atoa ai ma lo matou talitonuga afai ae toe faafoisia mai sona malosi ona toe faaauauina lea o ona tiute ma ona nafa tausii faafulautusi. Peitai sa gasegase lava o ia ma saili togafiti ai loa i Niu Sila. Ina ua oo mai le tala ua maluu o ia, sa ma malaga loa ma Peseta Arasi Tiotio e fai ma sui o la matou aulotu e auai i ona toe sauniga. O au sa taitaiina le sauniga faale-aiga sa faia i le malumalu PIPC i Ranui i le Aso Faraile, 22 Setema 2017, i le itula e 5pm. Sa molimau nisi o ona aiga i ona uiga faagalogata, i uo ma e masani, i nai ona uso ma tuagane, e oo lava i uso o si ona tama i Niu Sila ma Samoa.

O ona toe sauniga sa faia lava i le malumalu PIPC i Ranui i le Aso Toonai, 23 Setema 2017 i le itula e 10am. O le faifeau lava o le aulotu PIPC i Ranui o Nathan Pedro sa fai ma taitai o le sauniga. O le molimau e tasi a le aiga, sa faia lea e si ona tuagane, le Faifeau Faiaoga mai le Kolisi Faaifeau i Malua, le Susuga ia Makesi Neemia FS. O le Tusi Paia sa faitauina e Solomona Uitime (Faifeau

Penisione PIPC), o le tatalo sa nafa ma le Faifeau Toeaina PIPC o Apa Lealiifano, a o le lauga sa faia lea e le Faifeau Penisione PIPC o Pelu. O le molimau faaleagaga sa ou faia, atoa ai ma le taitaiina o ona toe sauniga i lona oliolisaga tumau i le fanua maluu i Waitekere, Aukilani, Niu Sila.

Sa matou faatofa atu ia te ia i e pese faatofa a le 'au Kerisiano e pei ona masasni ai. Amuia lea auaua o loo maua mai e lona Matai, o loo faapea ona fai.

Tofa Taupa'u. Ia manuia lau malaga, tatou toe feiloai i se aso.

Rev. Letaulau Poufa Pesaleli FS,
EFKS Nuufou, Faleata

Tsunami

O le galulolo aupito sili ona toatele tagata na maliluu ai na mafua i se mafuie na lulu e lata i le motu o Sumatra i Indonesia ia Tesema 24 2004. E 285,000 tagata na maliluu ai, 5 miliona tagata ua leai ni mea e nonofo ai. E 12 atunuu o le lalolagi na sili ona aafia ai e pei o Bangladesh, India, Indonesia, the Maldives, Malaysia, Sri Lanka ma Thailand.